

六

人

人

人



光緒四會縣志編三

經政志

子目凡十四

班朝 經政一

會典開載凡元旦冬至 萬壽節在外直省文武大小各官俱設香案望 闕行三跪九叩首禮乾隆二十三年定三大節凡慶賀豫設香案 龍亭於 萬壽宮至日各官衣朝衣五鼓齊集文從東入武從西入至朝房禮生稟行禮各官以次至拜位禮生贊排班文東武西立班齊贊跪叩興行三跪九叩首禮畢贊坐班班退各官出其前後三日穿蟒服不坐班 皇上萬壽 皇太后萬壽俱同遇 皇后千秋惟穿蟒服一日冬至亦穿蟒服一日

德恆案舊志於遇 皇后千秋下有慶賀儀節亦同句此誤也謹查會典事例乾隆六十年嘉慶元年疊奉 上諭王公大臣及外省督撫等恭遇皇后千秋慶節及元旦冬至均停止筴賀是以通禮亦無京外各官屆期行禮儀節

凡遇頒到 詔敕照具 龍亭綵輿儀仗鼓樂地方官具朝服出郭郊迎齋官捧 詔敕安置 龍亭中南向齋官立於亭東本地官員北向行三跪九叩首禮眾官及鼓樂前導齋官隨亭後行至 萬壽宮眾官先趨入分文東武西序立候龍亭至 萬壽宮安正中齋官立亭東西向禮生贊排班樂作行三跪九叩首禮齋官捧 詔授展讀生跪受詣開讀案

前立禮生贊跪眾官皆跪贊宣讀展讀生敬謹讀畢眾官起立展讀生捧 詔授齋官跪受捧安 龍亭中贊跪叩興眾官行三跪九叩首禮畢受 詔官隨 詔回大堂供奉凡詔書經過地方官員軍民人等皆跪路旁候 詔過方起五里以內府州縣衛文武等官俱出城迎送五里以外不許每月朔望日文武官紳齊集 萬壽宮恭設 聖諭牌於正中禮生贊排班各官依次就拜位立贊跪叩興行三跪九叩首禮畢分班坐地軍民人等環立肅聽禮生詣香案前跪恭奉 上諭及 欽頒律例依次宣講畢各官退

案經政志一編多係照舊志錄載但以憲綱更其次第而已年號上 廟號年數下干支舊志所無

未便增入故與別編不同非自亂其例也

蒞官 經政二

凡新官上任將到先發紅示本衙門豫備儀仗出城迎接是日新官具公服先詣城隍廟陳牲醴祭告行一跪三叩首禮獻爵讀祝或有誓詞讀畢仍行一跪三叩首禮畢導引至本衙門陳設牲醴於儀門前致祭司門之神行一跪三叩首禮悉如前儀畢導引至月臺上更朝服設香案望闕行三跪九叩首禮畢易公服拜印置印匣於案中行一跪三叩首禮啟印匣出印置匣上再行一跪三叩首禮畢升公座阜隸排衙吏書用印呈押屬官吏役以次參見畢退入後衙謁竈神安香火其行香講書閱城祭倉等事次第舉行

祝文 附

城隍廟惟

神靈依南土澤被綏江操善善惡惡之權秉是

是非非之鑒無微不察有覺必知

某

承乏是邦夙夜維寅分

雖隔乎幽明心同保夫黎庶茲值

蒞任 寶誕

敬迓

神庥虔具

品饗

梨園聊申丹悃伏願綏州士女合四境而共樂雍熙震厥威

靈遍十方而同躋安謐尙

饗

儀門惟

神職司開闢啟納禎祥

某

恭膺

簡命來牧斯邑

茲當履任趨闕陞堂敬陳享禮虔念是將伏祈

神庥而默

祐永垂福澤以悠長闔署康安是賴是仰尙

饗

凡新官到任或次日或第三日例赴各廟行香前一日示期

至日視各廟應穿禮服及跪叩儀節分別行禮如

聖廟文

武廟行三跪九叩首禮城隍廟土地祠行一跪三叩首禮朔

望行香亦如之凡行香俱在黎明以昭誠敬雍正年間通行遵照

講書先於明倫堂設公座及講案文武諸生恭候於大門新官至一揖導引至明倫堂公座諸生行庭參禮官拱手答講生向上三揖端立抗聲講說書義畢三揖退次講如前儀講畢官申訓辭分給紙筆獎直講之生官起諸生仍趨至大門揖送

祭倉盤倉先日示期至日備牲醴祭告倉神行一跪三叩首禮畢啟倉封開盤米穀每年開徵色米祭亦如之

每年正月開印十二月封印俱由欽天監擇定日時禮部通行直省遵照其儀注與到任拜印同但封印止標印封不簽

押

迎春先立春日各官朝服至東郊向 句芒神位一揖三獻  
酒點睛再一揖迎 句芒神土牛回縣安於儀門外土牛南  
向 句芒神在左西向春在十二月望後 句芒神執策當  
牛肩在正月朔後當牛腹在正月望後當牛膝示民農事早  
晚屆交春時設案陳香燭牲醴各官朝服詣案前正官一人  
在前餘官以序列贊跪叩興行一跪三叩首禮執事者舉壺  
爵跪於正官之左正官受爵酌酒酹酒三授爵於執事者復  
行三叩禮眾隨行禮興各列綵仗正官擊鼓三聲執春鞭同  
眾官環鞭土牛由東起三匝三鞭乃各退

土牛芒神式先迎春期豫造句芒神一位塑土牛一座句芒

神高三尺六寸按一年三百六十日以立春之年定其老少  
寅申巳亥老子午卯酉壯辰戌丑未幼以立春日支受尅爲  
衣尅衣爲繫如子日立春屬水土尅水衣黃木尅土繫青帶  
是也用立春日納音爲頭髻金日平梳兩髻在耳前木日平  
梳兩髻在耳後水日平梳左髻在耳前右髻在耳後火日平  
梳右髻在耳前左髻在耳後土日平梳兩髻在頂直上如甲  
子納音屬金平梳兩髻在耳前是也用立春時爲掩耳卯至  
戌八時掩耳用手提陽時左手陰時右手子丑二時全戴寅  
時揭起左邊亥時揭起右邊蓋子丑爲嚴凝寅亥爲通氣也  
以立春納音爲鞋袴行纏金木皆繫行纏鞋袴金行纏左闕  
懸在腰左木行纏右闕繫在腰右水日俱全火日俱無土日

著袴無行纏鞋子土牛以桑柘木爲胎骨身高四尺按四時  
長三尺六寸按三百六十日頭至尾長八尺按八節尾長一  
尺二寸按十二時鞭用柳枝長二尺四寸按二十四氣以本  
年天干爲頭角耳地支爲身納音爲蹄尾肚如甲子年干屬  
木頭角耳皆青支屬水身黑納音屬金蹄尾肚白色是也以  
立春日干爲籠頭如甲日青籠頭之類以立春日支爲拘索  
寅申巳亥日用麻子午卯酉日用苧辰戌丑未日用絲凡土  
牛皆以冬至後辰日取水土於歲德方造之如甲巳年東方  
甲位乙庚年西方庚位丙辛年南方丙位丁壬年北方壬位  
戊癸年東南方戊位是也

耕藉詳下秩祀篇

救護日月凡遇日食於朔月食於望遵照部頒欽天監推算時刻於本衙門救護至期豫設香案於露臺臺下列樂人儀門列金鼓設各官拜位於露臺上俱向日月所在各官素服在川堂坐候陰陽生報初虧各官至香案前班首官上香各官俱行三跪九叩首禮興復跪陰陽生捧鼓進梓班首官擊鼓三聲堂下金鼓齊鳴少頃興暫退陰陽生報食甚行禮如前儀仍暫退陰陽生報復圓金鼓聲止各官復行三跪九叩首禮畢

案護蝕儀注舊例初食穿褶服行禮食甚更素服復圓乃穿朝服嘉慶十八年奉行自初虧至復圓俱穿素服



田賦

經政三  
戶丁附

漢武帝平南越仍舊俗令毋賦稅晉武帝始課田輸米州縣遠者歲輸算錢二十文唐宋歲課有加元乃按畝科米明洪武十四年初命州縣丈田編賦役冊肇慶一府每畝俱以三升二合一勺起科嘉靖十一年分官民僧道四項田地山塘夏稅秋糧仍故額萬厯九年詔天下丈田畝時各州縣科則不同其派額有二一曰糧通縣秋糧官民夏稅農桑米共若干每石派銀若干民米若干每石派銀若干夏稅米若干桑株若干出絲若干折派農桑米若干又鹽鈔折銀若干統計鈔若干一曰料卽貢也有均一料派補胖襖料折價銀若干自嘉靖九年始有四司料折價銀三十七年又有官米民米

每石增銀至萬曆十二年續派甲丁供用三庫料并鋪墊費折銀在官民米內每石通派十三年續派竹木翠毛等料銀崇正四年行通縣田地山塘連丁口共一條鞭法又新墾贏餘充餉米糧料起存銀內分五項一京庫官民米折銀每兩帶徵滴珠銀一分傾入錠內水腳銀二分一給差官一均一料銀內除生漆價銀另編一四司料銀一鋪墊料銀一竹木翠毛料銀又存留糧料銀內分七項一軍器料銀一總兵糧銀一留府軍餉米折銀一解府雙魚海朗二所增餉銀一倉米折價留支俸食銀一留支俸糧庫間月米折銀一留支學俸廩餼等項米折銀九年仍照通縣田地山塘原額徵賦通縣丁糧一條鞭徵銀另贏餘夏麥米折徵銀解充餉

國朝原額田地山塘四千三百零八頃四十六畝六分八釐  
三毫

上則田地山塘四百四十頃六十畝零一釐三毫每畝科正  
耗米五升四合五勺七抄該米二千四百零四石三斗五升  
四合九勺

中則田地山塘一千一百七十四頃七十七畝七分四釐每  
畝科正耗米四升二合八勺該米五千零二十八石零四升  
七合三勺

下則田地山塘一千八百五十八頃九十三畝一分零二毫  
每畝科正耗米二升九合九勺六抄該米五千五百六十九  
石三斗五升七合三勺

反都則田地山塘一百四十三頃零五畝三分一釐八毫每畝科正耗米四升零六勺六抄該米五百八十一石六斗五升四合二勺

下下則田地山塘四十六頃八十四畝四分一釐四毫每畝科正耗米一升四合九勺八抄該米七十石零一斗五升九合七勺

荏塘則六百三十八頃一十八畝四分五釐七毫每畝科正耗米一升三合四勺一抄六撮該米八百五十六石一斗八升八合五勺

以上六項官米八千四百一十七石九斗五升六合九勺  
民米六千零九十一石八斗零五合